

REGIONAL NEWS BULLETIN

Date – 02/02/2025 Time - 18:30 -18:40Hrs

HEADLINES (EVENING)

- Kumin tangka kum chung hian kawlpheha pekna-ah Load shedding (inenchhawktir) vawi khat mah siam a la ni lo.
- Nikum chung khan lirthei chetsualna vawi 124 a thleng a, mi 112 in nunna an chan.
- Delhi Assembly inthlan atana campaign chuan a vawrtawp a thleng mek.
- January thla chungin Gross Goods and Services Tax ah cheng vaibelchhe nuai 1 sing kua leh sang 5 hmuh a ni



POWER SITUATION

Power & Electricity department hotute sawi danin tun tangka kum chung hian department hnathawkte'n tan an lak avangin Load shedding (inenchhawktir) vawi khatmah siam a la ni lo.

Department hotute chuan hei hi hmasawna ropui taka an ngaih thu an sawi a. Mizoram pumin kawlpheha a hman tam lai bera a mamawh zat chu megawatt 167 point 85 MW niin tun January 2025 ah hian hei hi a kai a. Kawlpheha pawta hmangtu zawng zawng hi mi nuai 3, leh 722 an awm mek. An chhut dan chuan Mizoram hian tuitha hmang (Hydro Power) a kawlpheha siam chhuah theihna (potential) hi megawatt 3,500 a nei mek a. Nitha (Solar Power) siam chhuah theihna hi a siam chhuah tam ber laiin megawatt 9,090 siam chhuah theihna a nei mek baw an ti a. Kalphetha sem darhna tha leh tlo zawk siam tumin kawng hrang hrangin department thawktute chuan hma an la a. Chhengkaw chawm ngah lutuk transformer-te siam rem leh a tulna hmuna transformer thar dah te an tum a. Khaw chung electric hrui te pawh Ariel Bunched Cable (XLPE) a thlak vek tum a nih thu an sawi a ni.

Tuna an dinhmun mekah tuitha hmanga kawlpheha siamchhuah theihna hmun (Hydel Generating Station) hi 15 neiin kawlpheha an siam chhuah theih zat belh khawm chu megawatt 38 point 55 a ni. Ni tha hmanga kawlpheha siamchhuahna (Solar Generation Station) hi 5 awmin kawlpheha a pek chhuah theih zat chu megawatt 22 point 3 a ni. Kawlpheha sem darhna kawngah 132 kV line hi km 999 leh metre 75 a thui, 66kV line (33 kV level charge) hi km 128 leh metre 31 a thui, 33kV line hi km 1,532 leh metre 28 a thui, 11kV line hi km 5,555 leh metre 45 a thui, 11kV line (ABC) hi km 27 leh metre 8 a thui, LT line hi km 3,664 leh metre 42 a thui, LT ABC line hi km 217 leh metre 72 a thui an enkawl mek a. 132kV Power Sub Station hi 15 , 33kV sub station hi 64, transformer 2,404 leh building 454 an nei a ni.

Power department-in hna thawh mek lian tham tak chin 13 an nei a. Heng zingah hian Mw 10 pe chhuak thei tur Thenzawl Solar Power Plant leh Mw 5 pe chhuak thei tur Sumsuih Solar Plant te a tel a. Thenzawl hi kumin March thlaa an zawh theih an inbeisei. Mizoram pumah Smart Meter kalpui a ni dawn a, a pilot phase atan tunah hian Zarkawt vengah chhungkaw 500 velah kalpui chhin mek a ni.

Kawlphehtha siam chhuahna atan hmalak mek a awm nual a. Megawatt 24 pe chhuak thei tur Tuirini hydro electric project chu detailed project report (DPR) peihfel a ni tawh a, megawatt 24 vek pe chhuak thei tur Tuivawl HEP chu DPR tunlai sum hlutna mila siamthat leh a ni. Kawlphehtha megawatt 210 siamchhuak thei tur Tuivai HEP hi DPR ennawn leh mek a ni a, megawatt 460 pe chhuak thei tur Kolodyne HEP chu DPR ennawn leh tur a ni a, kawlphehtha megawatt 120 pe chhuak thei tur Tlawng HEP chu kuminah DPR peih fel beisei a ni. Heng bakah hian DPR siam tura bawhzui mek pathum an awm mek bawk ani.

<><><>

ASSEMBLY

Tun thla ni 19 atanga tan tur Assembly inkhawm (budget session) atan tun thlengin zawhna a la lut lova, sorkar atangin dan siam tura duan pakhat a lut tawh.

Assembly secretariat atanga thu dawn danin zawhna hi House chhunga chhan chi (starred question) leh ziaka chhan chi (unstarred question) pawh lut a la awm lova. Sorkar hian dan siam tura duan engzat nge putluh tur an neih tih hriat theih a la ni lo chungin tun thlengin dan siam thar tura duan pakhat a lut tawh ni-in Akashvani Aizawl chuan thu a dawng a. Tun tum assembly inkhawmah hian Prime Minister hlui Dr. Manmohan Singh-a sunna hun buatsaih a ni ang. Puan tawh angin tun tum Mizoram assembly inkhawmah hian March ni 4 khian finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh ang a. Hei hi budget a vawi 2 pharhna tur a ni a, tun tangka kum kallai hi sum harsatna avangin insawhngheh kum (year of consolidation)-ah ZPM sorkar chuan a puang a. Hmalakna lian tham kalpui an tum lo sa a. Kumin budget-ah hian ZPM-in inthlan hma a an lo intiam angte tihpuitlin theihna tur budget danglam hmuh beisei a ni.

March ni 20 thleng assembly inkhawm hi kal chho tura ruahman niin hemi chhung hian tangka tum thar sum ruahman hi pawm hman tura ruahman a ni. Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan pangngai angin Assembly chhungah thu a sawi ang.

<><><>

ROAD ACCIDENTS

Nikum chhung khan lirthei chetsualna vawi 124 a thleng a, hemi kaihnhawihah hian mi 112 in nunna an chan.

Nimina 'Road Safety Month' hawna inkhawmah Transport Secretary Pu Zosangliana chuan he thu hi sawiin lirthei chesual hi Police-in an chhinchhiah ve loh pawh a awm mai thei niin a sawi a. Lirthei chetsualna lo thleng thin hi mithiamte'n an zirchianna ah chuan za zel a sawm sarh panga hi lirthei khalhtu thiam loh a ni an ti a. A dang za zela 25 chu chhan dang vang a ni, an ti. Kum 5 chhung, kum 2019 leh 2023 inkar khan lirthei chetsualna vawi 547 a thleng a, lirthei chesual avanga nunna

chan hi mi 467 an ni. Lirthei chetsualna 289 hi lirthei khalhtu fimkhur loh vang a ni a, hemi avang hian mi 253-in nunna an chan phah a. Hemi hun chhung vek hian rui chunga lirthei khalh vangin lirthei chetsualna vawi 85 a thleng a, nunna chan mi 69 an awm. Mahni tlan lohna lam tura tlan (wrong side driving) avangin chetsualna vawi 44 a thleng a, mi 28-in an thih phah a. Lirthei khalh laia mobile hman vangin lirthei chetsualna vawi 5 a thleng a, mi 5-in an tih phah a ni.

Kumina 'Road Safety Week' thupui chu "Fimkhur leh him takin lirthei khalh thin ang che," tih a ni.



TUIVAI BRIDGE

Nikum March ni 13 atanga dawh tan Tuivai lei (Mizoram leh Manipur inkal pawhna feet 200 a thui Bailey Bridge) chu nimin khan dawh zawh a ni a, enchhin nghal a ni.

Tuisual Group YMA secretary Pu Lalfakzuala sawi danin Tuivai lei dawh hi nimin khan lirthei a tlan thei em tih en chhin a ni a. A enkawltu PWD EE sawm angin Tuisual Group YMA hruaitute chu a hmunah an kal ve a. Lei hi a rinawm tawk em tih enchhinna atan hian Truck lian (Hyva) hman a ni a. Lei hi Ton 20 ai a rit zawhpui loh tur a ni a, PWD Department chuan hei hi zawm vek turin mipui an ngen a ni. Tuivai lei hi Assembly inkhawm hma a hawn hman tum a ni a, February ni 2 bawr vela hawn hman beisei a nih thu Pu Lalfakzuala chuan a sawi.

Tuivai lei hi dawh zawh ni tawh mahse mipui hman theih a hawn a la ni lo a. Mizoram leh Manipur lam, lei bul thut kawng hi siam that a la ni lo a, Manipur lam chu tunah hian siam mek a ni. Mizoram lam hi kar leh lamah hna tan tum a ni. Hei bakah hian Chief Minister-in a hawn hma chu PWD lam hian zawh an la remti tih lo a ni.



THANGRAM

Thangram Indigenous Peoples' Movement (TIPM) hruaitute chuan Assam a Karimganj district chhunga an chenna ram mel 180 bial chu Assam atanga sathla a Mizorama beh an duh thu an sawi.

TIPM hruaitu Pu K. Vana Chorei chuan tun hnai khan Mizoram chief minister Pu Lalduhoma rawn hmu-in Mizorama beh a duhna kawngah a tanpuina an dil tih a sawi a. Chief minister pawhin a puihna an mamawhna-ah chuan theihtawp chhuahpui a lo tiam niin a sawi a. Hmakhawsang atanga Mizote'n an lo luah tawh Thangram bialah Mizo 32,000 bawr vel an awm niin Pu K. Vana Chorei chuan a sawi a. An chenna bialah hian Mizo hnam hrang hrang - Hrangkhawl, Sakachep, Molsom, Chorei leh Ranglong te an awm a. An luah chin ram mel 180 bial ni thin kha tunah chuan an vela hnam lian zawkte'n an nek nasat avangin mel 140 bial vel chauh a nih tawh a rin thu a sawi a. An hnam ziarang leh sakhaw him zawk na'n Mizoram a beh chu tih makmawh a nih thu leh hemi chungchangah hian Prime

Minister hnenah lehkha thehltut tawhin Assam sorkar hruaitute nen pawh vawi duai lo an inbe tawh niin a sawi a ni.

Pu K. Vana Chorei chuan British ho khan 'Old Kuki' ti a an vuah thu a sawi a, hriat hlat theih berah kum 1490 khan helai hmunah hian Mizote hi an lo inbengbel tawh niin a sawi bawk. Mizorama beh an duh thu hi kum 2020 atang khan nasa takin an lo aupui tawh niin a sawi a ni.



HOSPITAL INCIDENT

Zirtawpni zana Adventist Hospital, Seventh Day Tlang, Aizawl-a buaina thleng chungchangah vawiin khan Police ten mi 4 koin, naktukah Court-ah hruai an ni ang.

Vaivakawn Police Station atanga thu dawn danin, Zirtawpni zan khan damdawi-in pawnah intibuai-a insual an awm a, hemi zinga pakhat chu a nakruh a auh avangin General Ward-ah dahluh a ni a. A sualpuoi lo na deuh chu a thiante'n chhan tumin ward chhungah hian luh chilhin buaina a chhuak ta a ni. Hemi chungchangah hian Seventh Day Adventist Hospital Medical Superintendent chuan Vaivakawn Police Station ah FIR a thehltut nghal a. Hemi bawhzui hian Police te chuan vawiin khan Vaivakawn Police Station-ah mi 4 - Roderick Thangdingliana Renthlei (32), Zonuam, Lalduhawma Khawlhing (38), Kanan, Lalsangzuala Ralte (33), Luangmual leh Abenego Lalrinawma (31), Chhinga veng a chengte chu koin, man an ni a. Naktuk lamah Court-a thawn tura tih an ni a. Hetih lai hian damdawi-ina luta kutthlaktu a puhte lam pawh hian buaina intanna a thil thleng avangin Bawngkawn Police Station-ah FIR an thehltut ve tho bawk ni a thu dawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



DELHI ELECTION

Delhi Assembly inthlan atana campaign chuan a vawrtawp a thleng mek a. Tunkar nilaini ah vote thlak a ni ang a, ni 8 ah vote chhiar a ni ang. Campaign nan hun tlemte chauh a awm tawh avangin Political Party hruaituten ngawrh takin tan an la a. BJP hruaitu senior leh Prime Minister Narendra Modia chuan vawiin khan RK Puram ah thu a sawi a. AAP sarwkar chu demin an hlauthawngin darkar tin policy thar an puang a ti a. Kum 11 liamta chhung kha awmze nei loin an hmang ral tih sawiin hmasawna hna thawhloh an ngah hle a ni a ti bawk.

PM Modia bakah hian BJP hruaitu senior leh Union Minister Ashwini Vaishnaw te, Rajnath Singh-a ten Rajinder Nagar, Chadni Chowk leh Laxmi Nagar-ah te hun an hmang a ni.

Hetihlai hian AAP Convenor Arvind Kejriwal chuan Chief Election Commissioner hnenah lehkha thawnin an party worker te BJP worker ten an bei niin a puh a.

Congress President Mallikarjun Kharge chuan vawiin khan Mustafabad bialah thu a sawi a. Rahul Gandhi leh Priyanka Gandhi te tapwhin hmun hrang hrangah campaign-in hun an hmang a ni.

<><><>

GST

January thla chhungin Gross Goods and Services Tax ah cheng vaibelchhe nuai 1 sing kua leh sang 5 hmuh a ni. Nikum 2024 January thlaa lakluh aain zaa 12.3 in a sang Central GST atanga sum hmuh hi a vaiin cheng vaibelchhe sing 3 sang 6 leh 77 a ni a, State GST atanga hmuh hi cheng vaibelchhe sing li sang li leh 942 a ni.

<><><>

TARIFF

US President Donald Trump-an Canada atanga thil lakluh atanga chhiah tariff a tihpun chhan let nan Canada PM Justin Trudeau chuan zaa 25 in US atanga thil lakluha tariff an tihpun ve thu a sawi. Pu Trudeau chuan tunkar Thawhlejni atanga tanin US atanga thil an lakluh dollar tluklehdingawn 30 chuang manahte tariff hi zaa 25 in an ti pung tih vawiin khan Ottawa-a chanchinbumite a kawmnaah a sawi .

Hei bakah ihan China pawhin tariff hi zaa 10 in an tipung tih a sawi baw k a ni.

<><><>